



Barnimus filius fuit Bugislai ducis Pomeraniae. Is à teneris annis honestis studijs operam dedit, & in egregium principem euasit. Itaq; patre defuncto in Pomeraniae ducatu successit, & Annam ducissam Luneburgensem uxorem duxit, ex qua Bugislaum, Mariam, Annam, Sybillam, & Dorotheam liberos procreauit. Ex his Bugislaus immaturo morte obiit, Maria autem Ottoni comiti in Schauenburg & Holstein nupsit, eiq; Hermannum & Ottonem filios peperit. Cum autem & Philippus patruelis rebus in Pomerania iure praeset, principes inter se regionis limites diuiserunt, atq; cuiq; certam ditionem assignarunt, anno 1540. In ea

diuisione Barnimo inferior Pomerania cum Stetinensi regione, Philippo uero superior Pomerania, Vuolgastum, atq; Rugen cesserunt. Erat Barnimus erga literas optimè affectus: itaq; Stetinensem scholam restituit, & ut optimi auctores iuuentuti praelegerentur, curauit, doctissimis uiris undiq; liberalibus stipendijs eò uocatis, anno 1544. Pari ratione quoq; politicam disciplinam restaurauit, atq; ut omnia ordine fierent, constituit. Itaq; is ob uirtutes meritò inter illustres Germaniae Heroes connumerari debet. Monst. lib. 3. Cosmog.